

Nuup kiisalu Qasigiannugit Aasiaallu pilersorneqarnerannut erngup nukinganik nukissiorfinnik taakkununngalu atatillugu atortunik sanaartornermut, aningaasalersuineranut ingerlatsinermullu killiliussatut atugassarititaasut pillugit Inatsisartut inatsisaat pillugu Namminersorlutik Oqartussat nalunaarutaat

Maanna Nuup kiisalu Qasigiannugit Aasiaallu pilersorneqarnerannut erngup nukinganik nukissiorfinnik taakkununngalu atatillugu atortunik sanaartornermut, aningaasalersuineranut ingerlatsinermullu killiliussatut atugassarititaasut pillugit Inatsisartut inatsisaat nr. 22, 1. december 2021-meersoq, Inatsisartut inatsisaatigut nr. 17, 21. november 2022-meersukkut allannguutitalik, nalunaarutigineqarpoq.

Atuuffia

§ 1. Nuup kiisalu Qasigiannugit Aasiaallu pilersorneqarnerannut erngup nukinganik nukissiorfinnik taakkununngalu atatillugu atortunik sanaartornermut, aningaasalersuineranut ingerlatsinermullu killiliussatut atugassarititaasut Inatsisartut inatsisaatigut aalajangersarneqarput.

Erngup nukinganik nukissiorfimmik taakkununngalu atatillugu atortunik sanaartorneq allilerinerlu

§ 2. Naalakkersuisut Utoqqarmiut Kangerluarsunnguanni erngup nukinganik iluaquteqarluni nukissiorfik Nuummumut pilersuisoq alliniarpaat, aammalu erngup nukinganut nukissiorfimmik nutaamik Qasigiannuganut aamma Aasiannut pilersuisussanik sanaartorniartutik.

§ 3. Utoqqarmiut Kangerluarsunnguanni erngup nukinganik iluaquteqarluni nukissiorfimmik Nuummumut pilersuisumik allilerinermi ilaapput:

1) nukissiorfimmik innaallagialiummik nutaamik pilersitsineq, innaallagissap aqqutaanut maanna nukissiuutit Utoqqarmiut Kangerluarsunnguanni pioreersut aqqutaannut teknikkimut atortulersuutit tamatumani ilaasut ilanngullugit, nukissiorfimmumt sillimmatitut inissimasussamut atortulersuutitut pioreersunut ilanngunneqarsinnaasumut ilanngullugu attavilerneqartussamik, attaveqaasersuutit taakkununngalu ilaasunut atortussanik allanik, aamma illutanik ilaqartussamik, aamma

2) sullorsualiorneq maanna nukissiorfiup imeqarfigisaata Kangerluarsunnguup tasiata aamma Isortuarsuup tasiata akornanni.

§ 4. Erngup nukinganik iluaquteqarluni nutaamik Qasigianguanut aamma Aasiannut pilersuisussamik sanaartornermi ilaapput:

- 1) nukissiorfissamik nutaamik sanaartorneq kangerluup Kangersunerup eqqaani inissimasussamik, teknikkimut atortulersuutit tamatumani ilaasut ilanngullugit, sillimmatitut atortulersuutitalimmik, attaveqaasersuutitalimmik atortunillu tamatumunnga ilaasunik allanik ilalimmik aamma illutassanik ilalimmik,
- 2) sullorsualiorneq tatsit Kuussuup tasiata aamma Qinngap Ilulialeeraata akornanni,
- 3) imm. 1-imi pineqartup erngup nukinganik nukissiorfiliamiit innaallagissap aqputaanik Qasigianguanut aamma Aasiannut sanaartorneq.
- 4) Qasigianguani aamma Aasianni erngup nukinganik nukissiorfimmit nutaamit tunisisarnissap qulakkeernissaanut attaveqaatit.

Sanaartukkanik erngup nukinganik iluaquteqarlunilu nukissiorfinnik pioreersunik allilerinernik atortulersuusersuinernillu aningaasalersuineq

§ 5. Inatsimmi ilaasutut sanaartugassatut suliniutinik tamakkiisumik imaluunniit ilaannakortumik aningaasaliinissamut Aningaasaqarnermut Akileraartarnermullu Ataatsimiititaliamit akuerineqartumik Naalakkersuisut taarsigassarsisinnaapput, imaluunniit namminersorlutik oqartussat pigisaattut aktianik piginneqatigiiffimmumt suliffiup avataanit taarsigassarsisitsisartunit taarsigassarsianut qularnaveeqqusiinnaallutik.

Imm. 2. Naalakkersuisut imm. 1 naapertorlugu taarsigassarsiarineqartut, sanaartugassat Inatsisartut inatsisaanni matumani pineqartunut ilaasut aningaasalersorneqarnissaannut, Nukissiorfinnut imaluunniit aktiaatileqatigiiffimmumt Namminersorlutik Oqartussanit pigineqartumut taarsigassarsiariteqqissinnaavaat.

Imm. 3. Imm. 2-mi eqqaaneqartut aningaasanik taarsigassarsinerit ingerlanneqarsinnaanngillat atugassarititaasut Naalakkersuisut aningaasanik taarsigassarsinerimikkut pissarsiarisimasaannit pitsaanerusunik tunngaveqartillugit.

Imm. 4. Naalakkersuisut erniat, Nunap Karsiata ernianut aningaasartuutaanut matussutissat, aamma Nunap Karsiata taarsigassarsiarititaanut imm. 2-mi taaneqartunut aningaasartuutaanut allanut matussutissanut akiliutissat pillugit maleruagassiorsinnaapput.

§ 6. Suliassat §§ 2-4-niittut, taakkunungalu atasutut aningaasartuutit Naalakkersuisut aalajangiussaattut atugassarisani namminersorlutik oqartussat pigisaattut aktianik piginneqatigiiffimmumt, pioreersumut imaluunniit nutaatut pilersitamut tamakkiisumik imaluunniit ilaannakortumik tunniunneqarnissaat Naalakkersuisut aalajangiussinnaavaat.

Imm. 2. Namminersorlutik Oqartussat aktianit aningaasaatit aammalu taarsigassarsianit aningaasaatit akisussaaffigineqartut akiliutigissagaat pillugu aktiaatileqatigiiffimmi Namminersorlutik Oqartussanit pigineqartumi taarsigassarsititsisunut avataaneersunut pisussaaffiliisumik uppersaanissamut Naalakkersuisut piginnaatinneqarput.

Imm. 3. Taarsigassarsianut aktiaatileqatigiiffimmut Namminersorlutik Oqartussanit pigineqartumut taarsigassarsititsisut avataaneersut taarsigassarsiarititaannut qularnaveeqqusiinissamut, Naalakkersuisut piginnaatinneqarput.

Imm. 4. Utoqqarmiut Kangerluarsunnguanni Erngup nukinganik Nukissiorfimmi ingerlatsivioereersoq, tassungalu ilaasutut teknikkikkut ingerlatsiviit, attaveqarfiit, allatullu atasutut atortut, ivertitikkat aamma illut namminersorlutik oqartussat pigisaattut aktianik piginneqatigiiffimmut tamakkiisumik imaluunniit ilaannakortumik tunniunneqarnissaat Naalakkersuisut aalajangiussinnaavaat, takuuk imm. 1.

Erngup nukinganik iluaquteqarluni nukissiorfissanut atortulersuutitalinnut tunngatillugu neqeroortitsineq

§ 7. Inatsisartut inatsisaat manna naapertorlugu sanaartugassanik aammalu sanaartorneq pillugu neqeroortitsineq pisinnaavoq nunat tamalaat akornanni neqeroortitsinertigut, aammalu nunat tamalaat akornanni ileqquusut naapertorlugit neqeroorutissanik piniarnertigut.

Imm. 2. Sanaartornermi neqeroortitsisarneq pillugu Inatsisartut inatsisaat imm. 1 naapertorlugu sanaartortitsinernut atortinneqanngilaq.

Nunamut tamarmut pilersaarummi peqqussutit

§ 8. Naalakkersuisut nunamut tamarmut pilersaarusiornikkut tunngavissiami ersarinnerusumik aalajangersaasinnaapput erngup nukinganik iluaquteqarluni taakkualu atortulersuutissaannut, Nuummut kiisalu Qasigiannuanut aamma Aasiannut pilersuinissamut atugassarititaasussanik ersarinnerusunik, Inatsisartut inatsisaat manna naapertorlugu aalajangersarneqartunik.

Imm. 2. Naalakkersuisut aalajangersinnaapput nunamut tamarmut pilersaarusiornermut tunngavissiaq immikkuualuttortalersukkanik aalajangersagartaqartoq sumiiffiup ilaanut atortinneqartussanik ilaqartoq erngup nukinganik iluaquteqarluni nukissiorfiliornermut Nuummut aamma Qasigiannuanut aamma Aasiannut pilersuinissamut atortinneqartussaq pillugit, Inatsisartut inatsisaat manna naapertorlugu, taannalu kommunitut pilersaarutitulli inatsisitigut atortinneqassasoq.

Pinngitsaaliissummik taarsiissutitalimmik pigisanik aalaakkaasunik arsaarinnittarneq

§ 9. Naalakkersuisut piginnaatinneqarput pinngitsaaliissummik taarsiissutitalimmik pigisanik aalaakkaasunik piginnikkunnaarsitsinikkut illuutunik aalajangersimasunik tiguisinnaanermut, tamatuma sanaartugassanik erngup nukinganik nukissiorfiliornermut atatillugu pisariaqassusia naapertorlugit, Nuummut aamma Qasigiannuanut Aasiannullu Inatsisartut inatsisaat manna naapertorlugu pilersuinermit atatillugu. Pigisanik aalaakkaasunik pinngitsaaliissummik arsaarinnittarneq Pigisanik aalaakkaasunik arsaarinnissuteqartarneq pillugu Inatsisartut inatsisaat naapertorlugu pisassaaq.

Naqissusiinikkut pisortanut akitsuut

§ 10. Allagaatit, taarsigassarsinermit atatillugu allagaatit, naqitanngorlugit suliarineqarneri aamma uppersaasatit il.il., pilersitanut aamma sanaartukkanut Inatsisartut inatsisaannut matumunnga atatillugu suliaasut, pisortanut naqissusiinikkut akitsuusigassaatitaanngillat.

Imm. 2. Naqissusiinikkut akitsuummik akiliisussaataaanginnermut ilaapputaaq allagaatit aamma taarsigassarsinnermut atatillugu allagaatit il.il. pigisanik nalilinnik tunniussinerni imm. 1 naapertorlugu suliaasut.

Atuutilerfia

§ 11. Inatsisartut inatsisaat una atortuulerpoq ulloq 1. januaari 2022.

Inatsisatut inatsisaat nr. 17, 21. november 2022-meersoq (Aningaasalersuinnermut killissaliussat annertusineqarnerat) [\[1\]](#) ima atulernissamut aalajangersagaqarpoq:

§ 2

Inatsisartut inatsisaat ulloq 1. decembari 2022 atuutilerpoq.

Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut
Naligiissitaanermullu Naalakkersuisoqarfik, ulloq 24. november 2025

Jørgen Hammeken Holm (atsior.)

Pisortaq

/Ane Wraae Nielsen (atsior.)

[1] Inatsimmut allannguut §§ 5 aamma 6-imut tunngavoq

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut